

173-modda. Vasiylik va homiylikning maqsadi

Vasiylik o‘n to‘rt yoshga to‘lmagan yetim bolalarni va ota-onasining qaramog‘idan mahrum bo‘lgan bolalarni, shuningdek sud tomonidan muomalaga layoqatsiz deb topilgan fuqarolarni ularga ta‘minot, tarbiya va ta‘lim berish, ularning mulkiy va shaxsiy nomulkiy huquqlari va qonuniy manfaatlarini himoya qilish maqsadida belgilanadi.

Homiylik o‘n to‘rt yoshdan o‘n sakkiz yoshgacha bo‘lgan yetim bolalarni va ota-onasining qaramog‘idan mahrum bo‘lgan bolalarni, shuningdek sud tomonidan muomala layoqati cheklangan fuqarolarni ularga ta‘minot, tarbiya va ta‘lim berish, ularning mulkiy va shaxsiy nomulkiy huquqlari va qonuniy manfaatlarini himoya qilish maqsadida belgilanadi. Sog‘lig‘ining holatiga ko‘ra mustaqil ravishda o‘z huquqlarini amalga oshira olmaydigan va o‘z majburiyatlarini bajara olmaydigan voyaga yetgan muomalaga layoqatli fuqarolarga bu shaxslarning iltimosiga ko‘ra homiylik belgilanishi mumkin.

Qarang: O‘zbekiston Respublikasi Fuqarolik kodeksining [32-moddasi](#), O‘zbekiston Respublikasi “Vasiylik va homiylik to‘g‘risida”gi Qonuni 3-moddasining [ikkinchi](#) va [uchinchi xatboshilari](#), O‘zbekiston Respublikasi Vazirlar Mahkamasining 2014-yil 22-sentabrdagi 269-sonli qarori bilan tasdiqlangan “O‘zbekiston Respublikasida vasiylik va homiylik to‘g‘risida”gi nizamning [52-bandi](#).

(173-moddaning matni O‘zbekiston Respublikasining 2014-yil 20-yanvardagi O‘RQ-365-sonli [Qonuni](#) tahririda — O‘R QHT, 2014-y., 4-son, 45-modda)

174-modda. Vasiylik va homiylikni belgilash

Vasiylik va homiylik tuman, shahar hokimining qarori bilan belgilanadi.

Vasiylik yoki homiylik vasiylik yoki homiylik belgilanishiga muhtoj bo'lgan shaxsning yashash joyi bo'yicha, agar shaxs muayyan yashash joyiga ega bo'lmasa, vasiyning yoki homiyning yashash joyi bo'yicha belgilanadi.

Qarang: O'zbekiston Respublikasi "Vasiylik va homiylik to'g'risida"gi Qonuni 10-moddasining [uchinchi qismi](#), [4-bobi](#), O'zbekiston Respublikasi Vazirlar Mahkamasining 2014-yil 22-sentabrdagi 269-sonli qarori bilan tasdiqlangan "O'zbekiston Respublikasida vasiylik va homiylik to'g'risida"gi nizomining [8 va 9-bandlari](#).

(174-modda O'zbekiston Respublikasining 2014-yil 20-yanvardagi O'RQ-365-sonli [Qonuni](#) tahririda — O'R QHT, 2014-y., 4-son, 45-modda)

175-modda. Vasiylik va homiylik sohasidagi munosabatlarni huquqiy tartibga solish

Vasiylik va homiylikni belgilash va tugatish, davlat organlarining vasiylik va homiylik sohasidagi vakolatlarini amalga oshirish, vasiylar va homiylar huquqlarini amalga oshirish hamda majburiyatlarini bajarish, o'zlariga nisbatan vasiylik yoki homiylik belgilangan shaxslar huquqlarini amalga oshirish hamda mulkiy huquqlari himoya qilinishini ta'minlash yuzasidan kelib chiqadigan huquqiy munosabatlar "Vasiylik va homiylik to'g'risida"gi O'zbekiston Respublikasi [Qonuni](#) va boshqa qonun hujjatlari bilan tartibga solinadi.

Qarang: O‘zbekiston Respublikasi Vazirlar Mahkamasining 2014-yil 22-sentabrdagi 269-sonli qarori bilan tasdiqlangan “O‘zbekiston Respublikasida vasiylik va homiylik to‘g‘risida”gi [nizom](#).

(175-modda O‘zbekiston Respublikasining 2014-yil 20-yanvardagi O‘RQ-365-sonli [Qonuni](#) tahririda — O‘R QHT, 2014-y., 4-son, 45-modda)

(176 — 193-moddalar O‘zbekiston Respublikasining 2014-yil 20-yanvardagi O‘RQ-365-sonli [Qonuniga](#) asosan o‘z kuchini yo‘qotgan — O‘R QHT, 2014-y., 4-son, 45-modda)